

Date – 12/09/2025
Time - 07:30 -07:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. **Naktukah Prime Minister Narendra Modi an Sairang-Bairabi relkawng chu Aizawl lammual atangin a hawng dawn a, inbuatsaihna peihfel thawkhat a ni tawh.**
2. **Dampa bial by-election neih tur atan Political Party ten an candidate tur an puan hnuah, vote zawngin party te an fehchhuak tan nghal.**
3. **Prime Minister Narendra Modia chaun Uttarakhand tuilian tuarte tanpui nan cheng vaibelchhe 1200 pek a ni ang a ti.**
4. **Mauritius tana hmasawna ruhrel, eizawna leh healthcare atan special economic package pek a ni dawn tih Prime Minister Narendra Modia chuan a puang.**

<><><>

PM VISIT

Naktukah Prime Minister Narendra Modi an Sairang-Bairabi relkawng chu Aizawl lammual atangin a hawng dawn a,

Hemi atan hian ruahmanna hrang hrang te peihfel thawkhat a ni tawh a, venhimna, traffic leh a hawna hmun lammual bakah kawngpui leh kawngsir samfai thlengin ngawrh taka thawh a ni.

BJP Mizoram State President Dr K Beichhua an Bairabi atanga Sairang rel kawng a hawn tur chuan Mizoram chu hmalam hun eng tak a siamsak a ni a ti.

BJP Mizoram State Office Upper Republic Mipui Run-a Prime Minister in Mizoram Railway a hawn tur chungchanga thuthar thehdarhtute nimina a kawmnaah he thu hi sawiin, Dr K Beichhua chuan Bairabi atanga Sairang rel kawng hawng tura India ram kilkhawra awm Mizorama Prime Minister Narendra Modi-a a lo kal tur chu lawmawm an tih thu sawiin, Mizorama mi tute pawh an lawm a rin thu a sawi a, tun atang chuan Aizawl chu Railway Map ah a chuang ve tawh dawn a ti.

Hmarchhak state khawpui zingah rel kawngin a pawh 4 zingah Aizawl a tel ve tawh tur chu ropui an tih thu sawiin, inkalpawhna lamah leh kawng hrang hrangah hmasawna tam tak a thlen dawn a ti a, he hmalakna hi hmasawna huapzo tak ni a an hriat thu sawiin, rel chuan khualzinte chauh ni

lovin bungraw tam tak rang zawk, chak zawk leh tlawm zawkin a phur sak dawn a ni a ti.

Dr K Beichhua chuan he project hi 2008 atanga 2009 inkarah pawm a ni tih sawiin, kum 2014-ah Prime Minister Narendra Modi an a lungphum a phum a, kum 11 he project hi an thawh chhung hian tlang leh Luikawrte tan tlanga rêl kawng siam a ngai a, kilometre 51.38-a thui rel kawng ah hian leiverh 48, kilometre 12 a thui bakah lei lian 55 leh lei te 87 siam a ni a ti a, bridge number 116-na phe chu metre 104 laia sang niin, India rama lei dawh sang ber pawl a ni a ti.

<><><>

CONG PR

Congress Party Thalai, MPYCC chuan Sairang thlenga Rel lo lut tur chu lawmawm a ti takzet tih sawiin Social media hrang hrangah Rel chak chi Rajdhani Service a nih tur thu leh chu chu ZPM sawrkar hmalakna avang nia sawi awm chu mi thawhrim rah zara parchhuan tumna mai a ni a ti.

Congress Thalai President Pu Laltawnliana hovin nimin khan Bairabi leh Sairang inkara Rel tlan tur Prime Minister Pu Narendra Modi-a'n a hawn tur an tlawh a. Pu Laltawnliana chuan, Mizoram hmasawna atana pawimawh, kuthnathawktute thlai thar awlsam zawka hralh chhuah a nih theih nan te, Mizoram mamawh state pawn atanga man tlawm zawka kan lak luh theih nan te, zin veivah awlsam leh man tlawm zawka zin a nih theihna tura mellung pawimawh tak Congress kaihhruai Mizoram sorkarin a lo buatsaih lawk kha Mizoram mipui tan thil lawmawm tak a ni, a ti.

Pu Laltawnlianachuan, Congress kaihhruai Mizoram sorkarah khan Sairang thlenga Rel lo lut tur hian Mizoram tan hlawkpuina tam tak kan neih turte uluk taka zirchian hmasak lawk vek niin India ram leh khawvel hmun danga Rel an hman tangkai dan leh Mizoram mipui himna tur ni bawk siin he ruahmanna hi kalpui a ni a ti a. Rel lo lut tur avanga Mizoram mipui venhimna atan hmalakna hmasa ber pawh August ni 5, 2016 khan Bairabi Rel Station-ah ILP pek chhuahna tur Counter uluk taka siamin hawn a ni, a ti a, State chhunga industry hmasawna tihpun te, Mizo ten inbiak pawhna leh inkalpawhna awlsam leh mumal mantlawm zawk kan neih theih nan, State chhunga tourism hmasawna chak zawka kalpui, Tualchhung thalaite tan eizawna tihpun, Indian Railway Network hmangin Mizoram khawpui Aizawl chu India ram dang nen thlunzawm, zin veivahna man tlawm leh awlsam zawk anih avangin bungrua leh mipui mamawh chi hrang hrang man tlawm zawka kan neih theihna tur leh he Project hian state mipui tan remchanna a thlen turte pawh zirchian lawk vek a ni, a ti bawk.

<><><>

GST REFORMS

Mizoram State Tax Commissioner-in tun thla ni 22 atanga hman tur, GST rate thar angin sumdawngte chu an bungraw man tihnam ve turin a hriattir a, dan zawm lo te chu hrem theih an nih thu a sawi.

State Tax Commissioner thuchhuah tarlan danin, India rama GST rate thar hman tur hi tun thla September ni 22 atanga hman tan tur a ni a, bungraw tam zawkah GST rate tihnam a nih dawn avangin GST registration nei

sumdawngte pawhin GST rate hniam takna bungrua te chu a man an tihnam ve turin a hriattir a, chutianga ti lote chu GST dan hnuaiia Anti-Profiteering measure hmanga hrem theih an ni thu sawiin, mipuite chu rate hniam tûra ngaih hniam lova zuar/hralh an hriat te chu Taxation Office hrang hrangah te complain turin a chah a ni.

Hei bakah hian sumdawngin GST Return an file-in an inhralhna chu anmahni dawrtute hnena Tax Invoice an pekchhuah mil thlapin an tilang tur a ni a ti a. An Turnover chu an tax invoice pekchhuah copy hmanga thuneihtute hnena finfiah thei tura vawngtha tura chahin, a zawm lo te chu pawisa chawi tir an nih tur thu a sawi bawk a ni.

Mizoram BJP Vice President Pu Vanupa Zathang chuan sorkar laipuiin GST siamtha a, bungraw tam takah rate an tihnam chu mipui dinhmun enin a fuh hle a hriat thu a sawi.

Akashvani Aizawl zawhna chhangin, Pu Vanupa Zathang chuan Mizoram anga state rethei ah trade and commerce leh sumdawngna dangte a la san loh avangin GST rate sang chu mipuiten an la tlin lo a ti a, tunhnaia Union Finance Minister-in GST rate a tihnam chu a ti fuh hle a a hriat thu leh vantlang mipuite hamthatna tur dik tak ni a a hriat thu sawiin, GST rate hniam chuan nasa takin mipuite a chhawk zangkhai dawn a, sumdawng leh dawrkaite tan kawng a sah thui theih a rin thu a sawi a, he GST siamthatna hi mipuite tan a tha hle a ni a ti.

<><><>

DAMPA BYE ELECTION CAMPAIGN

Dampa bial by-election neih tur atan Political Party ten an candidate tur an puan hnuah, vote zawngin party te an fehchhuak tan nghal a,

ZPM Dampa bial by-election campaign committee huaihawtin bial chhunga unit tlawh chhuah program hman mek a ni a. tun kar chhung hian Minister Prof. Lalnilawma, ZPM General Headquarters Vice President Pu C. Lalnunnema leh Pu Vanlalsailova, Candidate te chuan khaw hrang hrang an tlawh kual a, heng khaw hrang hrang tlawh kualnaah hian mi thar engemaw zat ZPM-ah an lawm lut a ni.

Prof. Lalnilawma chuan, ramin hma a sawn zel a, hmanlai politics inbeihna ang kha kalsan zel a ni a ti a. Mipuiten rilru fim tak nen thudik zawk hriat an tum zel chu thil lawmawm tak a ni a ti a. Politics a nih avanga dawt leh thudik tluantling lo hmanga inbeih vak vakin ram a siam tha lo a, mipui rilru a dik lo zawnga hruai kawi tumna a nih avangin kalsan a ngai a ni, a ti.

MNF Party candidate Dr R Lalthangliana leh Pu Lalrintluanga Sailo chhungte chuan Dampa bial an fan an chhonzawm zel a. Heng khaw hrang hrang - Phuldungsei, Phulpui, Pukzing, Pukzing Vengthar, Hruiduk leh Marpara te an tlawh a ni.

Dr Lalthangliana chuan, Dampa Constituency chu Mamit District - Aspirational District an nih avangin, he hmalakna hnuaiia hian hmasawngna nasa takin a thawh theih a ni a ti a, Pu Rintluanga Sailo vanga an ðahna mittui hrukhul sak turin a ngen tih a sawi bawk.



COURT ORDER

PWD, Kolasib Division Office, Tumpui Venga awm chu nimin khan Court order hmangin kalh sak ani.

Mizoram PWD chuan kum 2013/2014 bawr vel khan Serkhan leh Bagha inkar Kawngpui laih zauh hna thawkin, mimal ram tam tak a tihchhiat sak a. Ram neituten Zangnadawmna an hmuh tur zat pawh sorkar thuneitu ten an bithliah fel a, amaherawhchu chhan hrang hrang avangin Zangnadawmna hi pek fel mai theih a ni lo a. He thubuai hi Kolasib District Court-ah hun engemaw chen a inchiah hnu in, nikum December khan Kolasib Fast Track Court chuan ram neitu ten Zangnadawmna an dawn tur te chu PWD-in thla 2 chhunga pe fel turin order a lo tichhuak tawh ani.

Kolasib Court order hi PWD lam chuan an tih hlawhtlin mai loh avangin ram neitute lungawilo chuan Kolasib District Court-ah kumin March thla khan Execution Petition an file a, Court chuan hun tiam siam sak leh mahse PWD-in zangnadawmna chu an la pek theih loh cheu avang leh thu mumal an neih theih loh avangin Kolasib Fast Track Court Judge, Pu R. Vanlalena chuan PWD, Kolasib Division bik Office building, Tumpui Veng, Kolasib a mi kalh sakna tur Order chu a tichhuak ta a ni. Hetih rual hian PWD Office lirthei leh JCB te bakah khawl lian dang engemaw zat chu Court hian a hrensak bawk ani.

Zangnadawmna tur sum hi a vaiin cheng vbc 3 nuai 42 sing 2 & 5,444 a ni a, ram neitute hi mi 62 niin, Saiphai leh North Chaltlang khua mite an ni.

Tun hnaia Supreme Court of India order khauh tak avangin Execution petition te hi thla 6 chhung a chinfel ngei ngei tur a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PWD/YMA MEMORANDUM

Central YMA Hall ah PWD leh YMA ten Mizoramin kawngpui tha a neih theihna tura thawhhona thuthlung an ziah chungchang sawihona hun nimin khan Aizawlah hman a ni a. PWD Engineer in Chief Pu H. Zoramliana leh Central YMA President Pu Lalhmachhuana ten an kaihruai.

Pu H. Zoramliana chuan thusawiin Mizoram inkalpawhna kawngpui tha neih turin PWD leh YMA thawhhona a tha a, PWD in kawngpui enkawl an ngah thu leh sum indaihlohna avanga duhtusama enkawl theih a nih loh thu te, YMA te tawiamna leh thawhpuina an mamawh thu a sawi. MOU ziah avanga hmun tam takah hmasawna leh kawngpui siam kawnga awlsamna an hmuh thu a sawi.

Central YMA President Pu Lalhmachhuana pawhin thusawiin YMA ten kawngpui siam te pawngpaw sawisel mai lova MoU ziah anih avanga tawiawm tur leh thawhpui tur an nih dan te, sawisel tul a nih chuan huai taka sawisel a tul thu leh en pui zel turin YMA hruaitu kalkhawm te a chah a. PWD nena thawhhonaah theihtawp chhuah a kawngpui tha kan neih theihna tura hma la turin a chah bawk.

He hunah hian Sub- Hqrs YMA, Group YMA leh Branch aiawh te an kalkhawm a. Zawnha leh chhanna hun hman a ni a, Zoram hmun hrang hranga kawngpui siam chungchanga harsatna leh kawngpui chhia chungchante sawiho leh inhrilhfianna hun hman a ni bawk.

YMA leh PWD te hian kum 2018 atang khan thawhhona thuthlung an lo ziaak tawh a, kum 2022 ah ziah thar leh a ni a, tunhnai August 8,2025 khan kum 3 chhung atan MoU hi ziah thar leh a ni.

He hunah hian PWD atangin E-in- C leh a thawhpui CE, SE, EE te an tel a, YMA lam atangin Central YMA OB, CEC, Sub- Hqrs aiawh, Group YMA aiawh leh City Branch aiawh te an tel.

<><><>

PM

Prime Minister Narendra Modia chaun Uttarakhand tuilian tuarte tanpui nan cheng vaibelchhe 1200 pek a ni ang a ti. Nimina Dehradun-a tuilian tuarte chungchang ngaihtuaha high level committee thutkhawmah he thu hi sawiin Pu Modia chuan tuilian chhiatna a thlen avanga thi chhungte chu cheng nuai 2 theuh zangnadawmna pek an ni ang a ti a. Hliam tuarte pawh cheng sing 5 theuh pek an ni ang a ti bawk.He hunah hian tuilianin a tihchhiat in leh lo, kawngpui leh school te siamthat dan tur sawiho a ni bawk a ni.

<><><>

PM

Mauritius tana hmasawanna ruhrel, eizawanna leh healthcare atan special economic package pek a ni dawn tih Prime Minister Narendra Modia chuan a puang.

Nimina khan Prime Minister Narendra Modia leh Mauritius Prime Minsiter Navinchandra Ramgoolam te chu Varanasi ah an inkawm a. Ram pahnihte hian thawhdunna tur inremna thuthlung pali an ziaak a. Thuchhuah intawm an siamah Prime minsiter Narndra Modia chuan ram pahnih thawhdunna tihngheh zel an rem ti tih a sawi a. India leh Mauritius chu ram pahnih ni mahse an hmahlir erawh thuhmun a ni a ti a.PM Modia chuan ram pahnih thawkdun mai niloin chhungkhat ang hial an nih thu a sawia ni. Pu Modia chuan vawiina inremna an ziah zingah hian IIT Madras leh Indian Institute of Plantation Management ten University of Mauritius nena thawhdunna a tel thu a sawi.

<><><>

GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah titlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

GST tharah hian sawrkar laipui chuan lirthei zuara eizawngte tana chhawr theih tur kalphung thar a siam a. Lirthei ke hnih nei zignah 350cc hnuaia lamah GST zaa 28 lak thin chu zaa 18 a tihhniam a ni a. Sumdawna atana hman bus, truck, three-wheeler leh auto part ah te zaa 18 lak a ni tawh dawn bawk a ni. Varanasi-a khawlaia sumdawng Hars Gupta chuan GST thar chu an tan chuan Diwali thilpek anih thu a sawi

<><><>